

Generis asparagi historia naturalis atque medica. Dissertatio inauguralis botanico-medica / auctor Mauritius Bresler.

Contributors

Bresler, Moritz, 1802-1851.

Publication/Creation

Berolini : F. Nietackii, [1826?]

Persistent URL

<https://wellcomecollection.org/works/syyep8zs>

License and attribution

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.


You can copy, modify, distribute and perform the work, even for commercial purposes, without asking permission.



15304/p

15
GENERIS ASPARAGI

HISTORIA NATURALIS ATQUE MEDICA.



DISSERTATIO

INAUGURALIS BOTANICO - MEDICA,

QUAM

**CONSENSU ET AUCTORITATE GRATIOSI
MEDICORUM ORDINIS**

IN

UNIVERSITATE LITTERARIA BEROLINENSI,

UT SUMMI

IN MEDICINA ET CHIRURGIA HONORES

RITE SIBI CONCEDANTUR,

DIE XX. FEBRUARII A. MDCCCXXVI


H. L. Q. S.

PUBLICAE DEFENDET

AUCTOR

MAURITIUS BRESLER,

SILESIUS.



OPPONENTIBUS:

I. BRANDT, MED. ET CHIR. DR.

H. KALCKSTEIN, MED. CAND.

H. ERNST, IUR. CAND.

BEROLINI,

TYPIS FERDINANDI NIETACKII.

[1826]

GENIUS ASPARAGI

ORDO NATURALIS ATQUE MEDICA

304881

JOHANNES WILHELMUS

MAJESTATIS BOTANICO-MEDICAE

UNIVERSITATIS IMPERIALIS RECOLLENSIS

PHILOSOPHIAE ORDINIS

PHILOSOPHIAE ORDINIS

PHILOSOPHIAE ORDINIS



MAJESTATIS RECOLLENSIS

M. ERNST, SED. CAND.

M. KALKSLEY, SED. CAND.

M. ERNST, SED. CAND.

RECOLLENSIS

PHILOSOPHIAE ORDINIS

**MAGISTRATIBUS
VRATISLAVIENSIVM**

**GENEROSISSIMIS, NOBILISSIMIS,
ILLUSTRISSIMIS,**


STUDIORVM SVORVM ACADEMICORVM

ADJVTORIBVS BENEVOLENTISSIMIS,

NEC

MAGISTRATUS
VRATISLAVIENSIS

GENEONON, NEC NON
ILLUSTRISSIMIS



STUDIORUM SEORUM ACADEMICORUM

ADUTORIBUS BENEVOLENTISSIMIS

NEC

VIRO CLARISSIMO, AMPLISSIMO,
EXPERIENTISSIMO

A. G. E. T. HENSCHEL,

MED. ET CHIRURG. DOCTORI, IN UNIVERSITATE LITTE-
RARIA VIADRINA PROF. PUBL. EXTRAORD. SOCIET. REG.
BOT. RATISB. NATUR. CURIOS. HAENS. ET SILES. PATR.
CULTR. SODALI, VRATISLAVIENSIVM MEDICO
FELICISSIMO,

PRAECEPTORI FAUTORIQUE,

SUMMOPERE COLENDO

A T Q U E

VIRO PRAENOBILISSIMO, ERUDITISSIMO

GUILELMO KOTHE,

MED. ET CHIRURG. DOCTORI, EQUITUM LEGIONIS MEDICQ
PRIMO, APUD BEROLINENSES ARTEM MEDICAM
FELICISSIME EXERCENTI

HOSPITII MUNERUM BENEFICIORUMQUE

GRATISSIME MEMOR

VIRI CLARISSIMO, AMPLISSIMO

EXPERTISSIMO

HASCE

A. G. E. T. HENSCHEL

STUDIORUM SUORUM PRIMITIAS

AD A. G. E. T. HENSCHELI

OPUSCULI

PRIMITIAS

PRIMITIAS

PIO GRATOQUE ANIMO

COMPOSUIT

D. D. D.

VIRI PRACERISSIMO, ERUDITISSIMO

WILHELMO KOTHE

OPUSCULI

AUCTOR.

PRIMITIAS


OPUSCULI

PRIMITIAS

LECTORI BENEVOLO

S. D. P.

A U C T O R.



Omnium fere plantarum monocotyledones, liliis praesertim affines, in genera atque ordines suos difficillime rediguntur, et propter summam singularum inter se similitudinem et propter majorem omnium ipsarum partium simplicitatem notas ideo minus crebras variasque praebentium. Unde fit, ut de harum plantarum familiis naturalibus botanici vel peritissimi maxime inter se dissentiant. In illis igitur cognoscendis et dividendis vix eadem, quae in aliis classibus, probari poterunt normae ac praecepta, et notae ad

ordines generaque constituenda alias vix adhibita hisce in plantis summi erunt momenti. Quare quo diligentius singulae earum species fuerint indagatae et quo plures ejusdem generis socii innotuerint, eo perfectior ordinum evadet cognitio. Quae identidem mecum reputantem studio huic aliquando quantulumcunque incumbendi audax fateor—at juvenili forsitan levitate excusanda me incessit libido. Quid valerent humeri, quid ferre recusarent, ut experirer, dissertationis inauguralis conscribendae venia me impulit a gratioso medicorum ordine rite impetrata. Sed ne Deliis antiquis dudum decantata scriptis inventisque recentissimis haud plane imbutus denuo recinerem, Illustr. Link, rei herbariae arbitrum nimirum incorruptissimum, praeceptorem meum summo opere colendum, consului. Haud improbavit vir egregius consilium captum; quod quo facilius efficerem, gratiam mihi conciliavit Nobiliss. Dr. de Schlechtendal, herbariis regiis praefecti, quibus bibliothecaque botanica adjecta liberrime uti hujus viri non minus humani quam eruditi

liberalitate comitateque eximia concessum est. Ex immensa autem plantarum ibi accumulatarum copia Asparagorum genus ideo elegi adumbrandum, quod dissertationis spatio satis commode coerceri, haud parum relinquere extricandum, novas nonnullas praeberere species easque ad totius generis naturam cognoscendam multum valentes, nec non medicis, quae memoratu sat digna sunt, offerre videbatur. In ipso labore summa integritate usus sum; plantas, quaecunquae mihi diversae oblatae sunt in herbariis, seorsum descripsi et postea demum cum auctorum contuli sententiis, specierum numerum ne augerem, sed minuerem potius, ubique enisus, id quod haud uno loco mihi contigit. Attamen quas ex indagine diligentissima a cognitis plane abhorrentes inveni formas, has quin pro novis haberem speciebus, non potui. Descriptiones ceterum diagnosesque, novis accedentibus civibus, omnes denuo composui, casu vero non ablativo, sed, suadente Ill. Link (¹), perspicuitatis gratia nominativo ap-

1) Elem. philos. botan. Berol. 1824. p. 441.

posui. Nam ut Pyrrho olim Epirotae Delphium consulenti Pythia (2) cecinit: haud aliter de plantis canitur, si v. g. calycibus petalis majoribus exornantur.

Quantum per vires tenues licuit, rem diligenter gessisse mihi videor. Quae tamen in auctorum sententiis comparandis minus docte prolata, in specierum generumque cognatorum differentia totiusque gregis affinitate perscrutanda minus sagaciter eruta, in ipsis denique descriptionibus minus dextere atque expedite fuerint concinnata, haec, Lector Benevole, imperitiae juvenili temporisque angustiis velis condonare. Fretus enim indulgentia Tua haecce in lucem prode non dubitavi. Vale faveque libello.

2) Ajo, te, Aeacida, Romanos vincere posse.

reddi (*). Galenus (*), purgatis a Graecis dicitur esse
 caelesti tenuis ad fructus semineque productionem
 asperantes Asparagi salutem, quae tamen vobis
 dum plantarum hinc tota de nomine dicitur. Post
 hinc restantia et Corradam Theophrasti et Aspa-
 ragum alibi Dioscoridis appellatam sunt. Quibus
 enim immortelle Asparagum narrantur, physica-
 rum, aspidelium, sicut etiam ante coarctos
 prius tamen diligenter descriptis et de quibus hinc
 manne saltem Hermannus A. asperantem. Plu-
 rimum capens, in tam et saltem Tom.

§. 1,

De Asparagorum genere iam apud veteres passim
 proditum est, idque satis copiose. Ipse Theophras-
 tus Eresius, botanicorum princeps, haud uno loco
 Asparagum commemorat, eoque praesertim memo-
 ratu dignus ei videtur, quod cum nonnullis aliis plan-
 tis folia fere nulla procreet, sed ex toto sit spina (1).
 Species Asparagi in Europa australi Africaque bore-
 ali indigenas (2) Graeco ante oculos esse versatas, vix
 quisquam dubitabit. Dioscorides (3) iam duo distinguit
 Asparagi genera, quorum alterum Corradam vocat,
 neque vero accuratius describit, alteri autem, altili,
 folia esse refert Foeniculinis simillima longa nume-
 rosa, radicem grandem spongia praeditam. Hunc As-
 paragum sativum esse censuerim. Diligentissime ver-
 bisque copiosissimis Asparagi culturam agricolis prae-
 cipit Cato (4), quem verbo tenus fere Plinius Secundus

1) hist. plant. ed. Schneid. l. VI. cap. 1.

2) Asp. aphyllum, A. horridum, A. acutifol. etc.

3) de mat. med. l. II, cap. 118.

4) de re rust. c. 161.

reddit (5). Galenus (6), quamvis a Graecis omnes fore cauliculi tenues ad fructus seminisque productionem augescentes Asparagi salutentur, genus tamen quoddam plantarum prae ceteris ita nominari docet. Post litteras restauratas et Corruca Theophrasti et Asparagus attilis Dioscoridis amplificatae sunt. Clusius enim immortalis Asparagum maritimum, phyllacanthum, acutifolium, album etsi iam antea cognitos primus tamen diligentius descripsit et depinxit, Burmannus falcatum, Herrmannus A. sarmentosum, Plukenetius capensem, retrofractum et asiaticum, Tournefortius verticillarem et horridum, Lamarkius stipulaceum, africanum, crispum, tenuifolium, Forskälus stipularem, Willdenovius racemosum, Iacquinus decumbentem, Thunbergius dependentem, subulatum, flexuosum, lanæum et scandentem, Fischerus dauricum, Candollius tricarinatum, Bruno fasciculatum, Donius filicinum; quibus hae pagellae umbellatum umbellulatum grandiflorum teragonumque adjicient.

§. 2.

Jam rem ipsam aggressurus in hocce paragrapho generis naturam in universum exponere, tertio genera nostro affinia comparare, quarto historiam generis geographicam brevibus exarare, quinto de viribus Asparagi medicis disserere, sexto denique species singulas distinguere et describere constitui.

Est vero Asparagis radix annua, biennis nec

5) hist. nat. ed. Hard. I. 19. c. 8.

6) de aliment, facult. I. II. c. 58.

non perennis, fasciculato - ramosa. Radiculae ⁷⁾ plerumque perpendiculares, pennae corvinae sed pollicis etiam crassitie, longitudine diversa; quinque enim vel sex pollices haud raro aequant, nonnunquam autem crassities longitudine vix superatur; unde fit, ut tuberum ovalium induant formam. Emittuntur e radiculis fibrillae tenues, flexuosae plerumque atque ramosae.

Ex ipsius radicis basi, qua in unum radicae colliguntur, plures proficiscuntur cauliculi aut annui aut perennes, nudi primordio, squamis alternis tecti, in apicem squamatam finiti, edules. Re vera gemmae hae sunt radicales, aggregatae, elongatae (blastemata), eodem auno evolvendae (aestivacula) atque plures gemmulas parturae. Gemmulae autem istae et in innovatione et in axillatione ovaes sunt, squamis infra imbricatis supra subvaginatis membranaceis stipularum munere postea functuris, folia apposita, erecta, nullo modo plicata, florum rudimenta, nulla vero ramenta nec pubes intra se continentibus, glaberrimis vestitae ⁸⁾ (gemmae tectae stipulaceae completae vaginato-squamatae folio-floriferae). Ramificatione evoluta caules plerumque aggregati in conspectu sunt herbacei aut lignosi, glabri, laeves, ramosi, inermes armative, quae arma aculei nec spinae sunt alares axillaresque, recti plerumque, reflexi, solitarii nec non aggregati. Folia cauli, frequentiora tamen ramis

7) Haud consentientibus inter se auctoribus de notione radicularum, Ill. Link (phil. bot. elem. p. 112), recentissimum philosophiae botanicae auctorem secutus sum.

8) Gemmas A. decumbentis solummodo indagare licuit. Hujus autem ramificationem cum pleraeque species aemulentur, gemmas etiam similes fore, confido.

insident alterna, sessilia, saepius fasciculata, rarius solitaria, nonnunquam linearia, plerumque vero capillaria, neque vero setarum vel ipsarum spinarum naturam repudiantia, ita ut nonnullis speciebus folia plane derogarent solasque spinas adscriberent veteres botanici; ceterum acuta vel mucronata sunt, erecta, raro patentia, stipulis suffulta deciduis aut persistentibus, solitariis aggregatisve, ramos etiam subjuvantibus, membranaceis, gemmarum (si originem respexeris) tegminibus relictis.

Axillae, alae, rami ipseque caulis flores exserunt rarissime sessiles, creberrime pedunculis geniculatis sustentos, solitarios, binos, aggregatos, racemosos nec non umbellatos, bracteis membranaceis suppositis. Flores simplici instruuntur perianthio, quod calycem an corollam nominare malis, nostra nil interest. Constat autem e foliolis (sepalis, petalis) senis, basi connexis (ut perianthium etiam monophyllum sexpartitum nominari liceat) lanceolatis, obtusis, glaberrimis, integerrimis, erectis reflexisque. Eorum plerumque basi stamina inseruntur perianthium aequantia, erecta, aequalia, filamentis filiformibus vel subulatis, glabris, antheris bilocularibus, globosis aut ablongis, integerrimis vel sagittatis, incumbentibus erectisque, liberis usa. His pistillum circumdatur stamina aequans germine subgloboso, ovato aut obovato, supero, sessili, nisi pedunculi geniculati articulum superiorem germinis esse pedicellum extra florem positum feceris. Exit in stylum solitarium, filiforme, glabrum, trifidum, cujus stigmata aut connivent aut reflectuntur, acuta seu globosa sunt. Styli autem tripartitio jam in germine agnoscitur, quippe quod haud raro trigonum reperiatur angulis subsulcatis styli partitioni respon-

dentibus, ut germina revera terna in unum postea coalita stylosum ternorum partes inferiores connexisse videantur. Diclini nonnullarum evadunt specierum flores, iique abortu. Masculi enim foemeneique structura nihil fere inter se differunt; hi tamen praeter germen staminibus sterilibus instucti sunt, illi praeter stamina germine et puncto in eo prominente gaudent, stylo vero plane destituti sunt. Hos solos perscrutatus Linnaeus (9) toti generi stylum derogavit stigmaque punctum esse prominens statuit, quem errorem Haynius (10) jam dudum emendavit *)

Flores baccae excipiunt globosae, ovatae, trigonae vel tricoccae etiam, baccarum juniperinarum, pisorum, rarius nucum juglandum magnitudine, coccineae, coeruleae vel cinereae, nitidae, apice haud raro stylo, basi perianthio persistente marcescente ornatae, triloculares, succulentae vel exsuccae. Ceterum origine tot acini, quot postea loculamenta, esse videntur, ut jam supra monui. Pulpa baccis contenta gustu mucilaginoso-dulci est. Fructibus delapsis receptaculum (trophospermium) subpyramidatum in conspectum venit.

Semina singula vel bina loculamentis insunt arillo tecta membranaceo. Hunc vero in maturioribus praesertim seminibus distinctissimum membranam etiam pericarpium internam habere licet. Si bina adsunt semina, eodem vestitur utrumque arillo, alterum alteri superimpositum, illud lenti parte inferiore dis-

9) genera plant.

10) Arzneypflanzl., Bd. 8.

*) Diclinos inveni: *A. offic.*, *tenuifol.*, *declinat.*, *verticill.*, *umbellat.*, *aphyll.*, *acutifol.*, *depend.*, *lanceum.*

sectae, hoc lenti parte superiore dissectae simile. Sin-
 singula continentur semina, formam induunt mere
 lenticularem atque arillo proprio instructa sunt. Um-
 bilicus albescens, pubescens, planus, in media semi-
 nis superficie altera conspicuus absque funiculo pe-
 ricarpium ipsi columellae inseritur (semen sublenticu-
 lare peritropum). Testa s. membrana externa (epis-
 permium Rich.) nigerrima, nitida est, qua exuta ipse
 prodit nucleus membrana interna non vestitus. Maxi-
 ma ejus pars albumine (perispermio Juss., periem-
 bryo Lk.) cartilagineo, subpellucido expletur. Embryo
 filiformis, subclavatus a seminis margine laterali al-
 tero medio exorsus secundum dorsum ejus marginem
 petit oppositum, descendens simul et ad basin non
 nihil vergens (embryo endospermicus, intrarius, he-
 terotropus, eccentricus). Medium tamen inter basin
 et dorsum atque plane horizontalem inveni embryonem
 Asparagi decumbentis Jacq. Nonnunquam embryonem
 reperi arcuatum, ita ut fines ejus umbilicum specta-
 rent (embryo amphitropus Rich.).

De pullulandi ratione nihil afferre possum, quum
 semina per plures hebdomades ipsa aqua oxymuria-
 tica digesta ne vestigium quidem ostenderint germi-
 nationis, neque apud auctores carpologicos hac de
 re quidquam traditum inveniam.

Ex his, quae sermone magis pedestri adhuc dic-
 ta sunt, facile characterem generis nostri naturalem
 lege artis concinnabis. Talem, nisi quid moraris,
 statuerim.

A s p a r a g u s.

Perianthium simplex, profunde sexpartitum.
Laciniae suberectae, lanceolatae, obtusae.

Stamina sex, longitudine perianthii, perigyna. Filamenta erecta. Antherae biloculares,

Pistillum longitudine staminum. Germen subovatum, sessile, superum. Stylus solitarius, filiformis, erectus, trifidus. Stigmata reflexa.

Pericarpium bacca subglobosa, trilocularis. Loculi mono-seu dispermi. Receptaculum pyramidatum.

Semina lenticularia, peritropa. Arillus membranaceus. Membrana externa coriacea, interna nulla. Albumen cartilagineum, pellucidum. Embryo filiformis, clavatus, heterotropus, eccentricus, dorsalis. (11)

§. 3.

Plurima eorum, quae caractere naturali modo stabilito continentur, aliis quoque propria sunt generibus nonnullis Asparago affinibus, a quibus genus nostrum notis certis distinguere haud adeo facile est. Pertinent huc *Dracaena* (12) atque (quamvis in systemate Linnaeano ipso ordine dirimuntur) *Medeola* (13) nec non *Myrsiphyllum* a Willdenowio (14) sejunctum. *Dracaenam* in Linnaei operum primis editionibus cum *Asparagis* in unum genus videmus coactam. Habitus autem utrisque plane diversus. *Dracaenae* trunco arboreo, procerissimo, palmarum sti-

11) sit venia huic termino vix usitato, hic autem necessario.

12) Hayne: *Arzneypflanzl.* Bd. 9. T. 2.

13) *bot. mag.* 1316.

14) *Magazin der Gesellsch. naturforsch. Freunde zu Berlin.* 1808. p. 25.

pitibus haud absimili, foliis longis latisque gaudent; Asparagi caule herbaceo vel fruticoso, foliis plerumque fasciculatis, filiformibus, ad summum linearibus vel sine floribus ab illis dignoscuntur. Quare Linnaeus postea utrumque genus separavit, notis autem fructificationis adjectis haud plane probandis. Filamentis enim ei praecipue differre videntur alteri medio incrassatis, alteri, ut videtur, filiformibus. Filamenta autem Dracaenae Draconis praesertim non medio incrassata, sed basi dilatata sunt, quam ob rem Willdenovius (15) filamenta medio subcrassiora indicare videtur. Asparagi specierum nonnullarum, v. g. officinalis, filamenta filiformia omnino sunt, plurimis autem basi dilatata. His igitur distinguere nequeunt haecce genera.

In Asparagi autem officinalis et Dracaenae ensifoliae descriptionibus iconibusque a Gaertnero (16) exhibitis graviores inveniuntur differentiae. Seminis Asparagi integumenta, ut jam antea dictum est, simplicia sunt, Dracaenae semina membrana et externa et interna utuntur. Hujus embryo prope umbilicum positus est, illius prope dorsum seminis. Asparagi germen sessile, Dracaenae pedicellatum est, id quod ab Haynio, (17) investigatore sollertissimo indefessoque primo observatum invenio. Praeterea etiam stigmatibus mihi discrepare videntur. In Asparagi enim speciebus stylum invenio solitarium, trifidum; in Dracaena Dracone stylum solitarium in stig-

15) eam. plant. hort. Berol. p. 373.

16) de fructib. et sem. plant. t. 1. p. 56 et 57.

17) l. c.

mata tria globosa finitum, quae stylo integerrimo quasi imposita esse videntur, ita ut Asparagi stylum trifidum, Dracaenae trilobum dixerim. Denique Dracaenae partes genitales saepius exserta, Asparagorum semper inclusae sunt. Harum differentiarum nonnullae jam apud Sprengelium (18) et Brunonem (19) inveniuntur.

Neque cum Myrsiphylo aut Medeola, quacum Thunbergius (20) Asparagorum genus conjunxit, commisceri potest. Ex ipso enim Medeolarum Myrsiphyllorumque Convallariae affinium habitu ab Asparagi indole multum discrepante fructificationis partium diversitatem suspicabimur, nec falleremur. Styli enim et Medeolae et Myrsiphylli, uti jam Linnaeus indicat, terni sunt, in altero contigui, in altera divergentes; in Asparago semper solitarii, praeterquam quod in illis perianthium plerumque reflexum, in hoc fere semper erectum est.

Neque id objicies, jam in Asparago, ut germinata terna, ita stylos etiam ternos perfecturam fuisse naturam, ita ut in illis tantum perfecerit, quod in hoc solummodo spectaverit. — Hoc enim phytophysicis relinquatur indagandum, phytographi solam formam spectent.

Haecce genera inter se summopere affinia distincturi notis uti cogebamur haud adeo magnis, quod vero in omnibus fere monocotyledonibus, liliaceis praesertim, vix aliter fieri potest.

18) Anleit. zur Kenntn. der Gew. 2te Ausg. 2 Th. 1. Abth. S. 229 u. 231.

19) prodr. p. 294.

20) fl. cap. p. 332.

Hic compositis, generum recensitorum characteres essentielles facilius evolventur:

A s p a r a g u s.

Perianthium simplex sexpartitum. Germen sessile. Stylus solitarius trifidus. Bacca trilocularis: loculi dispermi. Embryo eccentricus dorsalis.

D r a c a e n a.

Perianthium simplex sexpartitum. Germen pedicellatum. Stylus solitarius trilobus. Bacca trilocularis: loculi dispermi. Embryo eccentricus umbilicalis.

M y r s i p h y l l u m W.

Perianthium simplex sexpartitum. Styli terni conniventes. Bacca trilocularis: loculi dispermi.

M e d e o l a.

Perianthium simplex sexpartitum. Styli terni divergentes. Bacca trilocularis: loculi dispermi.

Characteres nunc compositi ad omne adaptati sunt systema. Facile eos ad systema sexuale referes, si Medeolam et Myrsiphyllum ab Asparago et Dracaena ordine sejunxeris signaque e stylis ternis petita omiseris.

Quae cum Asparago modo collata sunt genera, in diversas illum trahunt partes. Dracaena enim, partibus fructificationis omnium maxime illi affinis, habitu diversissima — mirum sed verum dictu — palmis admovet Asparagos. Nam ipsam Dracaenam, si habitum respexeris, procul dubio palmam dices. Myrsiphyllum, praecipue vero Medeola, viam sternit satis

claram ad Polygonatum, inde ad Majanthemum et Convallariam, qua ad Asphodelorum ordinis cives varios ducitur. Per Majanthemum vero ad Trillium pervenit, a quo Paris nostra nihil fere differt, nisi numero quaternario. Trillii (²¹) vero Paridisque folia cordata, ovata de Tamo (²²) monent, qui foliis rigescentibus ad Smilacem, (²³) inde ad Ruscum (²⁴) transit. Haec vero satis dilucide monstrant, genus nostrum dicotyledonibus haud parum contiguum esse. Smilacis enim atque Rusci nec non multarum ipsius Asparagi specierum caulis lignosus et ramosus, folia ovata, cordata, haud raro venosa, Paris atque Majanthemum a numero ternario atque senario ad quaternarium aberrans dicotyledonum praesentiam signis apertissimis indicant. Accedit, quod in speciebus Asparagi fruticosi (A. capensi, A. horrido etc.) fasciculos lignosos etsi per totum caulem dispersos medio tamen rariores, versus marginem densiores medullam quasi quandam cincturos inveni.

Asparagi cognatis breviter lustratis, genus nostrum cuinam familiae naturali sit inserendum, quaeres. — Haereo responso. Jam Adansonius, (²⁵) botanicorum longe sollertissimus, familiam plantarum constituit, quae ab Asparago nomen traxit. Plura autem ei inseruit genera civitate excludenda. Linnaeus (²⁶) in-

21) Willden. hort. BeroI. 1. tab. 35.

22) Skuhr. 327.

23) du Ham. arb. ed. n. 1. t. 53. 54.

24) Skuhr tab. 340.

25) fam. des plant.

26) term. bot. ed. Giesecke append.

ter Sarmentaceas suas, gregem copiosissimam, Asparagum militare jubet. Iussievus (²⁷) ordinem Asparagorum peculiarem prodit haud exiguum, postea variatione divisum. Sprengelius (²⁸) Sarmentaceas probat, quarum in sectionem tertiam (Asphodeleos) Asparagum recipit ejusque affines. Aptissime tamen Candollius, (²⁹) Dioscoreis Smilaceisque jam a R. Brunone sejunctis, Liliacearum jam ab antiquioribus botanicis constitutarum a se emendatarum ordini priori praeficit Asparagum. Longum est, omnia enumerare recentiorum de hisce plantis disponendis praeposita; neque enim de Asparagoideis, sed de Asparago, hic agitur.

§. 4.

Haud per exiguum orbis partem Asparagi species progignuntur. Terrarum jam veteribus cognitarum nulla fere adeo est calida, nulla adeo frigida, quae generis nostri cives non alat. Media Europa speciem procreat ob turionum saporem olerum vernorum gratissimum. Planta haecce omnibus partibus mollissima frigore boreali rigescit atque per Europam Asiamque septemtrionalem copiosissimum invenis Asparagum maritimum. In Europa australi aequae ac in Africa boreali nec non Asia occidentali horridissimae conspiciuntur formae veteribus, ut videtur, haud alienae. Deinde utramque Africes oram insulasque ei adjacentes non deficiunt Asparagi. Largissimam autem eorum

27) gen. plant. p. 46 — 49.

28) Anleit. zur Kenntn. d. Gew. Theil 2. Abth. 1. p. 219.

29) theor. elem. p. 219.

copiam facie dissimilimarum promontorium bonae spei, Florae divitiis obrutum, offert. Asia australis species nonnullas prodit foliis latioribus floribusque racemosis insignes. In Nova Hollandia unum detexit gregis nostri socium R. Bruno. America universa Asparagos plane exulavit. Neque enim apud Michaux, neque apud Pursh, florae Americae borealis auctores, ullam speciem sponte natam, sed Asparagum solum officinalem cultum invenio *) Scriptores etiam plantarum Americae australis, quos evolvere licuit, Ruiz et Pavon, Humboldt et Bonpland, de hoc genere plane tacent.

Soli, quo maximè cives nostri laetantur, naturà haud eadem est; arena tamen iis amicissima esse videtur. Neque vero fluviorum ripas marisque littora ornare, paludes replere recusant; sylvarum quoque incolis procerioribus immiscere non timent, montium autem editiorum juga ascendere fere semper fugiunt.

§. 5.

Asparagi qualis nunc sit usus, inter omnes constat. Teneros scilicet cauliculos, priusquam in ramos et folia abierint, resecant ineunte vere lege artis olitores. Videndum autem est, ne maturius seriusve quam par est, neve iniquo loco a radice dirimant turiones. Asparagum officinalem hunc ad finem in hortis agrisque nostris coli, nominem fugit. Sed aliae quoque Asparagi species, A. verticillaris praecipue, huic usui adaptari poterunt. Olera haec verna sunt gratissima, quae coquis diversimode praeparantur. Jus-

*) Pursh fl. amer. septemtrion, t. 1. p. 235.

culis enim imbuuntur, butyro inunguntur nec non condiuntur. Hominibus sanis si comeduntur, palatum mulcent, ventriculum delectant, nutrimenti autem parumper modo praebent corpori, idque, ut jam Gale-
no visum est, non boni succi. Urinam cient atque nidorem ingratisimum Geranii Robertiani odori simillimum mox ei impertiunt; quam rem Lethi (30) primus observasse videtur. Evertes autem odorem illum ingratum, si, antequam minges, aquam spiritu-
salis ad acorem aceti vini acerrimi impraegrantam matulae infuderis (31). Terebinthinae in urinam effectus nobis invitis succurrit; sed gemmis etiam Asparagi longissimis, foliorum stipularumque forma de coniferis illis Terebinthinam offerentibus monemur.

Saluti raro injuriam inferunt Asparagi. Haematuriam tamen haud adeo levem ex Asparagi usu natam aegrotum ad huncce morbum adeo proclivem reddidisse, ut rediret, si plantae turiones in laborantis domo solummodo praepararentur, Lanzoni, medicus Italus, memoriae prodidit. (32) In partes quoque genitales, ut omnia fere remedia urinam cientia, haud parum valere fertur. Salaces enim inde effici viri, foeminae contra steriles evadere traduntur.

Qui malo aliquo diuturno laborant, his morbum exacerbare dicitur. Sic podagrae incessus celerare,

30) de alimento §. 9.

31) Macquer gazette salut. 1768. n. 32.

32) Act. nat. curios. vol. 1, p. 172.

haemoptysin recidivam reddere, phthisi igitur pulmonali affectis minime conducere fertur. (33)

Haud exiguas vires medicas veteres Asparago tribuebant. Stagnationes resolvere iis videbatur; quare radice decocta nec non semina contra morbum regium atque multa mala abdominalia adhibebant. In plurimas organorum uropoeticorum aegritudines haud parum valere Asparagum credebant. Propinabant radicem decocta dysuria, stranguria, renum vitiis diversis, (34) lithiasi (35) praesertim laborantibus, nec raro post usum ejus magnam arenularum vim emittam esse referunt. Artus quoque luxatos Asparago e vino cocto mulcebant. Odontalgias decocta dentibus inspersa sedare, nec non ipsae radices dentibus appressae absque ferro et dolore illos eradicare videbantur.

Nugis superstitioni certe debitis omissis id tamen pro certo habeam, vim quandam Asparago inesse in organa urinam parantia atque emittentia, fortasse et in alia colaloria agentem. Quare, si medicinam vocaveris plantam nostram, remediis acribus adnumeraverim, quippe quae omnes secretiones promoveant, majore autem copia consumpta ventriculum irritent, vomitum aliosque effectus sat vehementes exhibeant. Genus igitur nostrum Liliacearum civitatem, Smilacearum affinitatem forma jam stabilitam vi sua comprobant. Quem enim Scillae maritimae lotii promo-

33) Quarin. animadv. pract. p. 66. Boerh. aph. §. 1258.
Swiet comment. v. 4, p. 206, v. 5, p. 306.

34) Diosc. l. c.

35) Helmont. de lithiasi, c. 5. p. 17.

vendi facultas fugit? *Medeola virginica* *Asparago* *simillima* in morbis hydropicis *Americae borealis* incolas uti, multi narrant. *Alliorum*, *Asphodelorum*, *Trilliorum* vires diureticae et in universum acres satis innotuere. *Smilaces* plurimae omnia corporis nostri colatoria adeo aperiunt, ut sanguinem expurgare vulgo dicantur. Quae omnia doctrinae illi celeberrimae de plantarum forma atque virtute medica inter se comparanda ab *Illustr. Candollo* sagacissime prolatae haud exiguum addunt argumentum.

Ex *Asparagorum* succo inspissato crystallos quasdam consistentes collegerunt *Vauquelin* et *Robiquet*⁽³⁶⁾ columellis similes, duras, fragiles, gustu refrigeratorias, nauseosas, salivam cientes, ceterum naturam nec acidam nec alcalinam prodentes, facile aqua, spiritu vini nihil fere solubiles. Praeter partes constitutivas vegetabilibus consuetas azoti quoque particula una alteraque iis inesse videtur. Nomen *Asparagini* huic materiae inditum est. Praeterea faecula viridis, cera vegetabilis, albumen, natrum atque calcaria phosphorica et acetica, nec non sacchari genus quoddam mannae haud absimile eidem succo haud deerant.

Asparagino huic turiones nostri vires suas singulares debeant, an aliis materiis, qua virtute nova illa substantia in corpus nostrum valeat, id litteris nondum mandatum invenio.

Cf.

Franz: dissert. de *Asparago* e scriptis veterum, Lips. 1778. 4.

Cle-

36) *Journal de chemie*, 57, p. 88.

Clericis: de Asparago, auct. I. I. Bayer. Altdorf 1775.

Seidel: kurze Anweisung, den Spargel mit wenigen Kosten und zugleich vorzüglich schön zu bauen. Dritte Ausgabe. Erlangen 1786.

de Candolle: Versuch über die Arzneikräfte der Pflanzen, verglichen mit ihren äussern Formen u. ihrer natürlichen Klasseneintheilung, übers. von Perleb. S. 346 u. 47.

§. 6.

Asparagi species, quo facilius perspiciantur, ap-
tissime hac ratione distribui mihi videntur:

<i>Armati.</i>	<i>Inermes.</i>
1. fol. linearibus vel lanceolat.	1. fol. rigidioribus.
A. sarment.	A. acutifol.
falcatus.	phyllacanthus.
lanceus.	horridus.
2. fol. capillaribus acerosive.	2. fol. mollioribus.
1'. flor. solit. aggregatisve.	1'. fol. binis ternisve.
1''. aculeis ternis.	A. flexuosus.
A. capensis.	subulatus.
stipularis.	decumbens.
2''. aculeis solitariis.	crispus.
A. dependens.	scandens. *)
albus.	2'. fol. fasciculatis plurimis.
afric.	1''. flor. umbellatis.
retrofr.	A. grandifl.
stipularis.	umbellulatus.
2'. floribus racemosis.	umbellatus.
A. racemos.	2''. flor. 1 — 4nis.
fasciculatus.	A. filicinus.
tetragon.	verticill.
	tricarinus.
	dauricus.
	marit.
	officin.
	tenuifol.
	declinatus.

*) In descriptionibus sequentibus hanc speciem quamvis huc pertinentem inter armatos tamen juxta A. lanceum posui ob causam infra dicendam.

* **A r m a t i.**

1. *Asparagus sarmentosus.*

Folia solitaria linearia, aculei reflexi.

A. sarmentosus. Linn. fl. zeylan. p. 124.

Redouté: les liliacées, t. 8, t. 460. ic.

Asparagus aculeatus maximus sarmentosus zeylanicus. Herrmann hort. lugduno-bat. p. 63 ic.

Radix fasciculato-ramosa. Radiculae fusiformes pollicem crassitie aequantes albicantes. Caulis teres glaber sulcatus. Rami scandentes. Folia solitaria sparsa linearia acuminata integerrima unguicularia. Aculei solitarii axillares alaresque recti reflexi foliis breviores. Stipulae solitariae lanceolatae acuminatae minutae. Pedunculi solitarii foliis duplo breviores medio geniculati in racemum foliaceum dispositi bracteati. Perianthium campanulatum patens lentis fere magnitudine sexpartitum. Stamina perianthii basi inserta laciniarum ejus magnitudine. Filamenta filiformia. Antherae incumbentes globosae sagittatae. Stylus rectus trifidus. Stigmata tria. Baccae tricoccae. Semina solitaria.

Descriptionem secundum exemplar herb. Willden. ex horto Paris. (jardin des plantes) oriundum composui.

Hab. in insula Zeylona. Fl. Julio.

Europaeos in insula degentes plantam Scorzone-ram vocare ob saporem radicis, quam dulcem gratamque vel cum lacte aut carne coctam vel sale aceto et pipere conditam in deliciis habeant incolas, refert Herrmannus.

2. *Asparagus falcatus*.

Folia fasciculata linearia ensiformia, pedunculi axillares aggregati, aculei solitarii.

A. falcatus. Linn. fl. zeylan. p. 124.

Asparagus foliis falcatis ex uno puncto numerosis. Burmann thes. zeylan. p. 36. t. 13 ic.

Caulis ramosus. Folia nona-dena linearia acuta falcata sesquipollicaria. Stipulae ternae - quaternae minutae. Pedunculi quini-septeni foliis triplo breviores.

Neque Sprengelii (syst. veget. t. 2. p. 95) neque Linnaei (fl. Zeyl. l. c.) Burmannum citantis descriptio hujusce respondent iconi. Linnaeus enim racemos minutos, Sprengelius folia subterna plantae adscribunt. Flores autem aggregatos quidem, neque vero in racemum dispositos, folia nona fere ostendit icon. Equidem, planta in herbariis regiis deficiente, Burmannum, primum, ut videtur, hujus speciei auctorem, secutus sum.

Hab. in insula Zeylona.

3. *Asparagus scandens* Thunb.

Caulis inermis, folia terna linearia ensiformia.

A. scandens: Thunberg flor. cap. p. 334.

A. pectinatus: Réd. les liliac. tom. 7, t. 407. ic.

Caulis herbaceus scandens teres glaber. Rami solitarii ternique simplices. Folia sessilia terna lanceolata ensiformia acutissima glabra integerrima unguicularia. Stipulae ramorum ternae ovatae acutae, foliorum solitariae fimbriatae foliis duplo breviores. Pedunculi solitarii geminique axillares uniflori supra medium geniculati foliis longiores. Perianthium sub-

globosum sexpartitum. Lacinae conniventes. Stamina perianthii basi inserta inclusa. Filamenta subulata. Antherae erectae oblongae longitudine filamentorum. Germen globosum. Stylus erectus trifidus.

Hanc speciem quamvis inermem ideo huc retuli, quo melius pateret, quantum a sequenti, quaecum in unam redacta est speciem a Sprengelio, differret.

Hab. ad prom. bon. sp. in sylvis. Flor. Octobr. et Novembr.

4. *Asparagus lanceus* Thunb.

Aculei solitarii minuti, folia elliptico-lanceolata solitaria ternaque.

A. lanceus. Thunb. fl. cap. p. 334.

Caulis erectus angulosus glaber. Folia alterna sessilia solitaria (his exceptis, quae ultimis ramis insident atque terna sunt) elliptico-lanceolata integerima acuta nervosa glabra pollicem longa lineam lata. Stipulae ternae rigidae, altera extrafoliacea major basi in aculeum minutissimum rectum reflexum desinens, reliquae laterales minores. Pedunculi terminales solitarii geminique nec non terni uniflori foliis triplo breviores infra medium geniculati. Perianthium sexpartitum. Lacinae erectae. Stamina perianthio medio inserta inclusa. Filamenta lanceolata. Antherae erectae oblongae. Germen ovatum. Stylus erectus trifidus. Flores haud raro diclini: masculi germen tamen sine stylo et stigmate habent, foeminei staminibus plane carent.

Hab. ad prom. bon. sp.

Conjungit Sprengelius (syst. veg. t. 2. p. 95) species duas modo descriptas sub nomine A. aethiopici,

cujus igitur speciei Linnaeanae hasce Thunbergianas varietates habet. *A.* vero scandens ab *A.* aethiop. L. plane abhorret. Exemplaria enim illius satis crebra inter plantas capenses herbarii regii relata nomine quidem non instructa et cum exemplare herb. gen. nomine praedito et cum planta apud Redouteum depicteda (quam, an revera sit *A.* scandens Thunb. auctor adhuc dubius, *A.* pectinatum interim nominat) et cum descriptione Thunbergii plane convenit. Ejus autem folia semper sunt terna: *A.* aethiopicum foliis septenis exornat Linnaeus (mant. pag. 63). Similem quoque esse, eodem loco dicit, *Corruda* tertiae Clus. a nostro, si Clusii iconem comparaveris, toto coelo diversae. Eadem e causa ne *A.* lanceus quidem cum *A.* aeth. recte conjungi videtur, quae quidem sententia ipsi Thunbergio haud displicet. *Corruda* enim tertia Clus. a Linnaeo citata foliis angustissimis, fere filiformibus, gaudet. *A.* lanceo folia elliptico-lanceolata adscribuntur. An formae adeo discrepantes similes Linnaeo videri possunt? — Icon Clusiana *A.* albo L. respondet, qui ab *A.* dependenti Thunb. et *A.* africano Lam. haud adeo abhorret. Alterum utrum *A.* aethiopicum L. esse censuerim.

5. *Asparagus capensis.*

Aculei terni recti patentes: medius elongatus, flores solitarii geminique terminales sessiles, caulis ramosus: rami divaricati ramulosi.

A. capensis. Thunb. fl. cap. p. 334.

Asparagus aculeatus triplici spina. Pluk phytogr. t. 78. f. 3. ic.

Caulis fruticosus teres glaber pedalis. Rami di-

varicati ramulosi. Ramuli fasciculati unguiculares. Folia fasciculata octona-dena verticillum simulantia sessilia capillaria mucronata tomentosa lineam longa subimbricata. Stipulae solitariae membranaceae ovatae acutae margine ciliatae foliis duplo breviores. Aculei axillares alaresque terni recti patentes, medius elongatus, flores solitarii geminique sessiles terminales bracteati. Perianthium sexpartitum lineam longum. Lacinae erectae ovato-lanceolatae acutae. Stamina inclusa. Filamenta subulata. Antherae oblongae incumbentes. Germen ovatum. Stylus longitudine geminis trifidus, Stigmata tria. Bacca ovata triquetra trisulca, fere tricocca.

Hab. vulgatiss. infra montes prom. bon. sp. in frut. et sylv. fere omnibus. Fl. Maj. et Jun.

6. *Asparagus stipulaceus* Lam.

Aculei terni recti patentes: medius elongatus, flores solitarii geminique terminales, caules virgati ramosi: rami simplices fasciculati.

A. stipulaceus. Lamark encycl. bot. t. 1. p. 297.

Praecedenti simillimus, varietas fortasse ejus, neque ab eo differt nisi signis in diagnosi allatis. Caules enim non magnos ramos patentes ramulosos emittunt, sed simplices eosque fasciculatos minutos *A. capensis* ramulis convenientes. Reliqua, quae huic propria esse Lamarkius dicit, in *A. capensi* etiam inveniuntur.

Ejusdem speciei esse videtur planta, quam sub nomine *A. triacanthi* Ill. Lichtenstein herbariis regis donavit eo tempore, quo Lamarkii opus nondum innotuerat.

Hab. ad Prom. bon. sp.

7. *Asparagus dependens* Thunb.

Folia fasciculata capillaria, aculei solitarii recti reflexi, pedunculi axillares solitarii geminique.

A. dependens. Thunb. cap. p. 333.

A. rubicundus. Berg. plant. cap. p. 88.

Caulis fruticosus ramosus, flexuosus, quadrangularis sulcatus glaber. Folia fasciculata vicena et ultra, capillaria lineas fere quatuor aequantia. Stipulae plurimae acutae ovatae; aculei axillares, alaresque, solitarii recti, reflexi, folia acquant. Pedunculi solitarii geminique axillares cernui longitudine foliorum medio geniculati. Perianthium campanulatum sexpartitum. Lacinae lanceolatae concavae subpatentes. Stamina laciniarum basi inserta inclusa. Antherae erectae sagittatae. Germen obovatum. Stylus longitudine germinis trifidus. Baccae globosae magnitudine pisorum nigricantes.

Diclinos etiam flores invenio, eosque abortu.

Hab. ad prom. bon. sp.

8. *Asparagus albus.*

Aculei solitarii recti, pedunculi aggregati, folia fasciculata capillaria.

Corruda tertia. Clus. hist. plant. rar. p. CLXXIX ic.

Caulis teres glaber, junior albus, adultus colorem consuetum induens ramosus tripedalis. Rami alterni albi. Folia fasciculata octona- dena exstipulacea (stipulae forsan deciduae) tetragona mutica capillaria unguicularia. Aculei solitarii recti patentes longitudine foliorum. Pedunculi axillares aggregati foliis paullo breviores infra medium geniculati. Perianthium campanulatum sexpartitum subpatens. Stamina perianthii basi inserta inclusa. Filamenta filiformia. Antherae

oblongae incumbentes. Germen globosum. Stylus trifidus. Bacca globosa.

Hab. in Europa australi, Africa boreali, in Canariis, promont. b. sp.

Radices aut crudas aut coctas atque oleo, aceto et sale conditas comedunt incolae; folia gustu dulcia et gummosa sunt, Clusio quidem auctore.

9. *Asparagus africanus* Lam.

Aculei solitarii recti reflexi, pedunculi aggregati, folia capillaria arcuata.

A. africanus. Lamark encycl. bot. t. 1, p. 295.

Cf. Pluk. amalth. p. 40. t. 374 f. 4. ic.

Caulis fruticosus lignosus teres glaber bipedalis. Rami divaricati. Folia fasciculata dena-quindena pollicaria. Aculei solitarii recti reflexi lineas fere duas aequantes. Stipulae deciduae. Pedunculi axillares gemini aggregatique bracteati infra medium geniculati foliis triplo breviores. Perianthium campanulatum. Stamina perianthii basi inserta. Filamenta subulata. Antherae oblongae incumbentes. Germen globosum. Stylus trifidus.

Hab. ad. prom. bon. sp.

Ad exemplar plantis capensibus insertum nomine quidem non instructum, sed descriptionibus Lamarkii Sprengelique respondens characterem constitui.

10. *Asparagus retrofractus*.

Aculei solitarii recti, folia terminalia stellata.

Asparagus retrofractus. Forskäl. flor. aegypt. syr. p. 73. Lam. encycl. t. 1, p. 295.

Cf. Pluk. amalg. t. 375, f. 3, ic.

Lamark. l. c. et post eum Sprengelius (syst. veget. tom. 2, p. 95) aculeos ternos plantae adscribunt; Lin-

naeus ipse (spec. pl. ed. Reichardt et hort. Cliff.) et celeb. Forskälus (l. c.) aculeos solitarios referunt, quos brevissimos e stipularum induratarum basi nasci idem refert Forskäl. Inde etiam factum esse videtur, ut nec imago Plukenetii nec exemplar herb. Willd., quod descriptionibus ceterum respondet, ad juniores nimirum referenda plantas aculeis careant. Ceterum folia in supremis tantum ramis stellatim disposita plantam satis distinguunt. Florum nihil usquam inveni, ne in exemplare quidem Willdenowiano.

Hab. in Africa boreali et australi.

11. *Asparagus stipularis* Forsk.

Aculei solitarii recti reflexi, flores axillares solitarii, folia solitaria rigida.

A. stipularis. Forskäl. fl. aegypt. syr. p. 72.

Caulis angulosus diffusus ramosus. Rami patentes angulosi. Folia subulata mucronata angulata patentia conferta rigida solitaria pollicaria. Stipulae alares axillaresque extrafoliaceae membranaceae lanceolatae amplexicaules. Aculei solitarii reflexi. Pedunculi brevissimi. Perianthium campanulatum. Baccae coeruleae globosae baccis juniperinis simillimae.

Hab. rar. circa Alexandriam.

Plantam huic simillimam describit et depingit Jacquin (eclog. plant. t. 1. p. 59, tab. 40), foliis autem remotioribus cauleque non anguloso sed sulcato diversam. Hanc Sprengelius (syst. veg. t. 2, p. 95) cum *A. stipulari* in unam conjungit speciem, addens synonymum *A. Brousoneti* Jacq., oblitus, ut videtur, a se ipso primum hocce nomen inditum esse (catal. hort. Hal. 1804). Assentieris ceterum huic sententiae, si

caulem sulcatum facile in angulosum abire, foliis autem plus minus densis vix speciem a specie distingui posse cogitaveris. Reliqua enim utrique communia.

A. Brussoneti non in Africa, sed in Canariis indigenum esse, conjicit Jacquin.

12. *Asparagus asiaticus.*

Aculei solitarii recurvi, pedunculi solitarii, folia fasciculata capillaria

Asparagus aculeatus minor. Pluk. Phytogr. t. 15, f. 4. ic.

Caulis fruticosus teres glaber ramosus pedalis-bipedalis. Aculei alares solitarii recurvi 2''' — 3'''. Folia fasciculata quindena-vicena setacea mucronata glabra arcuata, 1'''—2''' longa. Stipulae ad exortum ramorum ternae, ad folia solitariae concavae membranaceae lanceolatae. Pedunculi solitarii uniflori medio geniculati foliis breviores. Perianthium sexpartitum. Lacinae reflexae. Stamina perianthii basi inserta longitudine laciniarum. Filamenta dilatata. Antherae oblongae incumbentes. Germen ovatum. Stylus erectus filiformis longitudine germinis trifidus.

Hab. in India orientali.

13. *Asparagus racemosus* W.

Aculei recti reflexi, folia fasciculata linearia subensiformia, flores racemosi.

A. racemosus. Willd. spec. plant. t. 2. p. 152.

Caulis teres fruticosus glaber. Rami solitarii alterni. Folia fasciculata sena pluraque linearia ensiformia unguicularia. Stipulae minutissimae deciduae

Aculei axillares reflexi longitudine foliorum. Racemi axillares pollicares. Pedicelli foliis duplo breviores medio geniculati. Bractee membranaceae ovatae concavae minutae singulis pedicellis subjectae. Perianthium campanulatum acicularum capita aequans. Laciniae erectae. Stamina basi inserta. Filamenta filiformia. Antherae incumbentes oblongae sagittatae. Germen ovatum. Stylus erectus trifidus.

Hab. in insula Zeylona.

Descripsi speciem secundum exemplar ipsius Willdenowii.

14. *Asparagus fasciculatus* R. Br.

Aculei solitarii divaricati, flores racemosi, folia fasciculata filiformia.

A. fasciculatus. R. Brown. prodr. flor. Nov. Holl. in Isid. t. 1, p. 858.

15. *Asparagus tetragonus* (spec. nov.)

Aculei solitarii recti reflexi, flores racemosi, folia fasciculata setacea tetragona.

Caulis teres striatus glaber ramosus divaricatus. Folia sessilia fasciculata bina-quaterna mucronata tetragona unguicularia. Aculei alares recti reflexi longitudine foliorum. Racemi axillares pollicares. Pedicelli foliis breviores medio geniculati bracteis membranaceis ovatis acutis suffulti. Perianthium patens campanulatum. Laciniae lanceolatae obtusae. Stamina longitudine laciniarum. Filamenta dilatata. Antherae incumbentes sagittatae. Germen globosum. Stylus brevissimus trifidus.

Hab. ad prom. bon. sp. Attulerunt herbariis Mundt et Maire.

Quantum e R. Brunonis descriptione satis succincta intelligitur, priori simillimus, neque ab eo diversus nisi aculeis reflexis, qui in illo divaricati (patentes) sunt. Huic etiam conjuxissem speciem nostram, si illius cognitionem perfectiorem habuissem, neque Nova Hollandia formas orbi antiquo adeo alienas progignere consuevisset.

* * Inermes.

16. *Asparagus acutifolius.*

Caulis inermis tomentosus, folia fasciculata rigida.

Corruda prior. Clus. rar. plant. hist. lib. V, p. CLXXVII ic.

Asparagus foliis acutis. C. Bauh. pin. p. 490.

Radix fasciculata. Radiculae senae-octonae pollicem crassitie aequantes. Caulis erectus teres nonnunquam angulosus vel sulcatus striatusve tomentosus inermis tri-sexpedalis. Folia fasciculata plurima exstipulacea rigida mucronata perennantia. Flores axillares solitarii geminique cernui odori. Pedunculi foliis longiores medio geniculati. Perianthium sexpartitum campanulatum. Stamina inclusa. Filamenta subulata. Antherae incumbentes oblongae. Germen obovatum. Stylus longitudine germinis rectus trifidus. Baccae cinereae.

Flores nonnunquam, ut aliarum specierum, abortu diclini

17. *Asparagus phyllacanthus* Lam.

Folia fasciculata rigida, caulis glaber inermis.

A. aphyllus L.

Corruda altera. Clus. rar. pl. hist. lib. V, p. CLXXVII ic.

Cf. Tournefort Beschreibung einer Reise nach der Levante. Aus dem Franz. Nürnberg. 1776. Th. 1. S. 352 ic.

Caulis fruticosus angulosus sulcatus glaber ramosus inermis. Folia fasciculata terna-sena acerosa acuminata fere spinescentia patentia unguicularia. Stipulae membranaceae deciduae plurimae et extrafoliaceae et intrafoliaceae. Hae pedunculos cingunt et bractearum prae se ferunt speciem. Flores axillares pedunculati cernui. Perianthium campanulatum. Stamina perianthii basi inserta inclusa. Filamenta basi dilatata. Antherae oblongae incumbentes. Pistillum staminibus brevius. Germen subglobosum. Stigma mutilatum, flores igitur abortu diclini.

Praecedenti simillimus, foliis tantum rigidioribus minus confertis, caule glabro distinguendus.

Odorem hircinum spargere plantam, refert Tournefortius l. c.

Hab. locis sabulosis Europae australis, Asiae minoris et Africae borealis; e saxorum saepe rimis pronascitur.

18. *Asparagus horridus*.

Folia rigidissima tetragona, caulis glaber inermis.

A. horridus, Redouté les liliacées, tom. 5, t. 288ic

Asparagus hispanicus aculeis crassioribus horridus. Tournef. instit. rei herb. t. 1, p. 300.

Cf. Tournef. itin. l. c.

A praecedenti vix distinguendus, nisi partibus omnibus rigidioribus crassioribus. Quod autem quum et in diversis ejusdem plantae ramis summopore variare ipse jam Tournefortius (Reise l. c.) tradat eumque Rédouté (l. c.) sequatur; in horum virorum sententiam non solum discedam, sed *A. acutifolium* etiam addam omnesque has tres species a Linnaeo constitutas ejusdem speciei (*A. rigidi* forsán nominandi) meras varietates habeam.

Hab. iisdem cum praecedenti locis, flor. per totum annum.

19. *Asparagus flexuosus* Thunb.

Caulis inermis, folia terna lanceolata.

A. flexuosus. Thunberg flor. cap. p. 333.

20. *Asparagus subulatus* Thunb.

Caulis inermis, folia terna capillaria, flores sessiles.

A. subulatus. Thunb. fl. cap. p. 333.

21. *Asparagus decumbens* Jacq.

Caulis inermis, folia terna capillaria, flores pedunculati.

A. decumbens. Jacq. hort. Schönbrunnens. t. 1, p. 71, tab. 97.

Radices fasciculatae tuberosae albidae unciales. Caulis angulosus glaber debilis inermis. Rami alterni alternatim ramulosi. Folia terna sessilia setacea trigona acuminata lineas fere duas aequantia. Stipulae extrafoliaceae solitariae membranaceae ovatae acutae integerrimae. Pedunculi axillares solitarii uniflori foliis duplo longiores infra perianthium geniculati. Perianthium sexpartitum. Lacinae lanceolatae obtusae reflexae. Stamina basi inserta laciniarum longitudine. Filamenta subulata. Antherae oblongae incumbentes. Germen ovatum (e tribus re vera partibus inter se coalitis pronatum facile videbis). Stylus brevis trifidus. Stigmata obtusa. Bacca, quam immaturam vidi, ovata stylo terminata subtrigona trilocularis. Columella basi incrassata e pedunculo elongato oriunda. Semina bina lenticularia nigra.

Hab. ad prom. bon. sp. Fl. Nov. et Decembr.

22. *Asparagus crispus* Lam.

Caulis inermis, folia gemina linearia.

A. crispus. Lamark: encycl. bot. t. 1. p. 295.

Caulis herbaceus flexuosus debilis subscandens bipedalis. Rami flexuosi filiformes. Folia linearia acuta gemina raro terna lineas duas-tres aequantia. Pedunculi solitarii articulo destituti tres lineas longi uniflori. Perianthium minutissimum. Habitus fumariae.

Hab. in Isle de France.

In descriptione, cum exemplaria deessent, Lamarkium secutus sum.

23. *Asparagus grandiflorus* (spec. nov.)

Caulis inermis angulosus, folia fasciculata capillaria, flores axillares umbellati.

Caulis inermis fruticosus sulcatus pubescens. Rami alterni angulosi ramulosi. Folia fasciculata octona-duodena acutissima angulosa unguicularia. Stipulae alares ovatae acutae. Flores axillares umbellati duodeni-quindenii. Bractee plurimae membranaceae. Pedunculi foliis breviores geniculati. Perianthium campanulatum florum Convallariae majalis magnitudine sexpartitum. Laciniae erectae ovatae. Stamina perianthii basi inserta inclusa. Filamenta basi dilatata. Antherae oblongae subsagittatae incumbentes. Germen globosum.

Plantis insertum Willdenowianis inveni, adjecto nomine Broussoneti et patria Teneriffa.

24. *Asparagus umbellulatus*. (spec. nov.)

Caulis inermis teres, folia fasciculata capillaria recurva, flores axillares umbellati.

Caulis teres glaber inermis. Rami alterni, Folia fasciculata setacea subpollicaria. Flores axillares umbellati octoni-deni. Bractee plurimae involucrum simulantes. Pedunculi brevissimi medio geniculati. Perianthium campanulatum sexpartitum. Laciniae lanceolatae erectae. Stamina medio perianthio inserta lacinias aequantia. Filamenta subulata. Antherae oblongae incumbentes. Germen globosum. Stylus rectus trifidus.

Hab. in insula Mauritii.

Misit Sieber.

25. *Asparagus umbellatus* (spec. nov.)

Caulis inermis teres, folia fasciculata capillaria, flores terminales umbellati.

Caulis inermis herbaceus teres glaber pennae corvinae crassitie. Rami erecti subfastigiati alterni simplices. Folia alterna fasciculata sena-octona approximata alaria rameaque capillaria acuta vix unguicularia. Stipulae solitariae extrafoliaceae alaresque membranaceae ovatae acutae minutissimae. Flores terminales umbellati rarissime verticillati sedeni-viceni. Involucrum polyphyllum. Foliola plurima membranacea ovata. Pedunculi foliis paullo longiores infra medium geniculati uniflori. Perianthium sexpartitum campanulatum. Lacinae erectae. Stamina basi perianthii inserta inclusa. Filamenta subulata. Antherae oblongae incumbentes. Germen superum globosum. Stylus erectus trifidus. Stigmata reflexa. Flores haud raro, ut in aliis speciebus, abortu diclini.

Hab. in Canariis, e quibus relatum herbariis regiis donavit Celeb. de Buch.

26. *Asparagus filicinus* Don.

Caulis inermis, folia fasciculata ensiformia, pedunculi axillares solitarii geminique.

A. filicinus. Caule erecto ramosissimo, foliis inaequalibus quinis linearibus falcatis mucronatis uninnerviis, pedunculis unifloris axillaribus solitariis geminis pedicellatis foliis brevioribus fructiferis longioribus. Don. prodrom. flor. Nepalensis. Lond. 1825, p. 49.

A. Cirillus. Roxb. hort. Beng. p. 24.

A. falcato similis esse videtur.

Patria Nepal.

27. *Asparagus verticillaris.*

Caulis inermis, folia fasciculata linearia, flores quaterni quinique.

A. verticillaris. Bieberstein flor. taur. caucas. t. 1.

A. orientalis foliis Galii. Tournef. coroll. p. 21.

Buxbaum plant. minus cognit. cent. V. 37 ic.

Caulis inermis herbaceus angulosus. Rami angulosi glabri. Folia alaria fasciculata octona-dena linearia subensiformia pollicaria. Stipulae solitariae ovatae. Pedunculi axillares quaterni quinique lineas duas longi medio geniculati. Perianthium campanulatum sexpartitum. Stamina basi perianthii inserta inclusa. Filamenta filiformia. Antherae globosae bifidae. Germen globosum. Stylus saepius nullus, flores igitur abortu diclini.

Hab. in Tauria, ad Caucasum, in Asia minori.

Plantae modo descriptae in herbario generali alia est apposita multis numeris cum nostra conveniens, foliis autem ternis (nec senis), floribus binis (nec quaternis) perianthiisque majoribus gavisia. An species peculiaris? — A. verticillarum a triphyllum interim nominaverim.

28. *Asparagus tricarinatus DC.*

Caulis inermis, folia fasciculata triquetra canaliculata, flores solitarii geminique.

A. tricarinatus. Rêdouté: les liliacées, t. 8, tab. 451.

Radix fasciculata dulcis. Caulis erectus teres inermis quinquepedalis. Rami patentes ramulosi. Folia fasciculata sena-septena verticillum simulantia inaequalia 4''' — 1'' longa arcuata triquetra canaliculata. Stipulae solitariae acutae. Pedunculi solitarii geminique axillares ultimis ramis insidentes 1½''' longi.

Similis A. verticillari.

Patria ignota.

29. *Asparagus dauricus*. Fisch.

Caulis herbaceus erectus, rami recti, folia fasciculata setacea elongata, pedunculi solitarii nutantes. Fisch. hort. Gorenk.

Hab. in Dauria.

Hujusce characterem e Linkii enumeratione plant. h. Berol., ubi Fischeri verba redduntur, desumsi, etsi ceteris speciebus non adaptatus est. Plantam autem nativam non vidi; cultam vero in herbario horti Berol. servatam ab Asparago maritimo mox delineando haud multum video discrepantem. Inter hunc et A. officinalem intermedius esse videtur. Hujus illiusve varietatem habuerim. Speciem tamen plane tollere ausus non sum, quia exemplaribus nativis atque descriptione fusiore deficientibus non probe hanc plantam cognovi.

30. *Asparagus maritimus*. Pall.

Caulis inermis, folia fasciculata rigida, flores solitarii geminique, pedunculi sub flore geniculati.

A. maritimus, Bieberstein: fl. taur. caucas. t. 3. p. 270.

A. amarus. de Cand. flore franc. t. 6. p. 309. Réd. les liliac. t. 8. tab. 446. ic.

A. Tauscheri. Fisch. hort. Gorenk.

A. officinalis, *a* maritimus L.

A. marinus Clus. l. c. ic.

A. maritimus crassiore folio. C. Bauh. pin. p. 490.

A. palustris. Raj. hist. pl. t. 1. p. 683.

Totius habitus rigiditate, partibus omnibus minoribus, foliis sublinearibus satis dignoscitur.

Hab. ad mare Caspium, in campis Sibiriae, ad littora Galliae australis.

Sprengelius (syst. veget. t. 2. p. 95 et 96.) A. amarum et maritimum sejungere videtur minus recte. Nam si A. amarum apud Candollium descriptum et apud Rêdouté depictum cum Biebersteinii verbis de A. maritimo prolatis contuleris: ab hisce auctoribus eandem exprimi speciem, per se patebit. Ceterum jam apud Rajum (hist. pl. 1. p. 683.) hujusce plantae notas ita fere accurate proditas, ut apud Candollium et Biebersteinium, v. g. ramos flexuosos, radicis amaritudinem etc., loca denique in flora gallica communicata (Aigemorte, Montpellier) invenimus. Quid? quod ibidem, num planta ab A. officinali specie differat, copiose et sagaciter disceptatur, idque perscrutandi ratio in Linnaei fere animum exhibetur. Magnolii quoque proponitur sententia ideo speciem peculiarem habentis, quod promiscue cum A. officinali locis inundatis progenita characteres suos tamen obtineat.

31. *Asparagus officinalis.*

Caulis inermis, folia fasciculata capillaria, stipulae geminae: exterior aristata, pedunculi gemini foliorum longitudine medio geniculati.

A. sativus. C. Bauh. pin. 490.

A. officinalis, Hayne: plant. medicat. t. 8. tab. 29. flor. dan. tab. 805. icc.

Radix fasciculato ramosa. Radiculae perpendiculares. Caulis inermis herbaceus erectus teres. Rami alterni. Folia fasciculata sena-octona capillaria acuta. Stipulae geminae extrafoliaceae membranaceae, quarum altera alteram aut plane aut maxima e parte tegit, exterior major aristata. Arista autem non e basi pronascitur, ut plerumque describitur, sed ex apice stipulae. Secundum totam quidem stipulam pellucidam lineam crassiorem e basi profectam vides, quae apice in aristam illam abit. Haec autem dirimi non potest ab ipsa stipula, ut in avenae v. g. glumis. Stipula interior tenuior acuta mutica. Pedunculi axillares gemini longitudine foliorum medio geniculati. Perianthium campanulatum. Lacinae lanceolatae. Stamina medio perianthio inserta inclusa. Filamenta filiformia. Antherae erectae oblongae. Germen obovatum. Stylus saepe mutilatus; flores igitur diclini. Bacca globosa corolla marcescente basi instructa, apice puncto nigro notata purpurea piso paullo major trilocularis. Loculi mono-dispermi. Semina sublenticularia nigra nitida.

Hab. locis sabulosis Europae. Flor. Jun.

Tres varietates statuit Linnaeus: *a*, maritimum, *b*, sylvestrem, *c*, altilem; quarum priorem ut speciem jam agnotam supra descripsi, secundam, cui jura specifica jam a Lamarkio concessa a Waldsteinio et Kitaibelio comprobata sunt, descripturi sumus, tertia notissima illa varietas est in hortis culta oleraceis. Huic novam varietatem addit Candollius, quam *A. maritimum minus* recte nominat non confundendum cum *A. officinali*, *a. maritimo* L. Hanc *A. officinalis*

varietatem promiscue cum *A. amaro* (*A. maritimo* Pall.) ad littora marina Galliae australis copiose crescere et in hortos deductam *A. altilis* s. *sativo* originem dedisse referunt auctores florae gallicae. Haec autem re vera non est varietas sed forma potius *A. officinalis* nativa, cujus sola varietas nunc *A. altilis* s. *sativus* habendus est.

Monstrosam praeterea *A. officinalis* varietatem depictam et descriptam invenio apud Joh. Bauhinum (hist. pl. t. 3. p. 726.), quae quotannis ineunte vere caules tripedales compressos, ramos sparsos progignebat; cetera naturalia erant.

32. *Asparagus declinatus*.

Caulis inermis, folia fasciculata capillaria, stipulae solitariae muticae acutae, pedunculi gemini foliis breviores medio geniculati.

A. declinatus. Thunb. fl. cap. p. 333.

Caulis inermis herbaceus teres glaber. Rami alterni declinati. Stipulae solitariae extrafoliaceae membranaceae ovatae acutae. Folia fasciculata octona vix unguicularia. Pedunculi axillares solitarii geminique foliis breviores medio geniculati. Perianthium infundibuliforme sexpartitum. Stamina infra medium perianthium inserta inclusa. Filamenta filiformia. Antherae oblongae erectae. Germen globosum. Flores diclini.

Simillimus praecedenti.

Hab. ad prom. bon. sp. Fl. Dec. et Jan.

33. *Asparagus tenuifolius*. Lam.

Caulis inermis, folia fasciculata, stipulae solita-

riae acutae muticae, pedunculi solitarii geminique sub flore geniculati foliis duplo breviores.

A. tenuifolius. Lamark encycl. tom. 1, p. 1.294. Red. liliac. t. 8. tab. 434.

A. sylvaticus. Waldst. et Kitaib. pl. rar. Hung. 3. p. 223. t. 201.

A. officinalis *b. sylvestris* L.

A. sylvestris tenuissimo folio. C. Bauh. pin. p. 491.

Caulis inermis herbaceus teres. Rami alterni. Folia fasciculata octona-vicena capillaria 2''' — 4''' longa. Stipulae solitariae membranaceae ovatae concavae acutae muticae. Pedunculi axillares solitarii geminique foliis duplo longiores sub flore geniculati. Perianthium campanulatum sexpartitum. Lacinae lanceolatae apice reflexae. Stamina perianthio aut medio aut infimo inserta inclusa. Filamenta filiformia. Antherae globosae incumbentes. Germen oblongum. Stylus in plerisque mutilatus, flores igitur diclini. Bacca permagna duplo fere major quam *A. officinalis* fructus.

Alias etiam praeter recensitas invenio species, ut videtur, nondum descriptas, aut in herbariis regiis servatas aut libris mandatas, quas vero et ob exemplaria manca et ob auctorum descriptiones minus perfectas omittere malui. Sic inter plantas Willdenowianas *A. arborescentem*, speciem satis distinctam, floribus autem orbatam, *A. mauritiani* non minus distincti exemplaria vero parca et parva, etc. invenio. In Buchleri itineribus novissime editis tamquam novae species enumerantur:

A. larycinus. Fruticosus, 4—5 pedalis. Rami ramulique albi. Spina brevis subrecurva. Folia subulata, subpollicaria, fasciculata. Flor. 1—5 in singulo fasciculo.

A. exuvialis. Caulis aliquando volubilis. Rami ramulique inermes, divaricatissimi, tecti epidermide tenui, albida, cito exuta, Folia setacea. Flor. axillares bini.

Hae species capenses diligentius sibi poscunt examen.

V I T A

EX DECRETO GRATIOSI MEDICORUM

ORDINIS ADJECTA.

Ego, Mauritius Bresler, natus sum Vratislaviae mense Augusto anni 1802, patre Benjamino, mercatore, matre Rebecca gentis Ollendorffianae; quos vero parentes optimos praematura morte mihi ereptos lugeo. Primis litterarum elementis imbutus gymnasium adii Elisabethanum, quod eo tempore in urbe patria auspiciis Ill. Etzler, praeceptoris mei ad cineres colendi, florebat. E gymnasio cum testimonio maturitatis, quod vocant, dimissum Ill. Unterholzner, t. t. universitatis Viadrinae Rector magnificus inter

cives academicos d. VIII m. Aprilis a. 1821 me recepit, Ill. W e n d t, facultatis medicae t. t. Decanus maxime spectabilis medicinae studiosis adscripsit. His autem interfui lectionibus: Ill. B r a n d e s de geometria sublimiori aequationumque theoria; Ill. W a c h l e r de arte historica, de rebus annis 1789 — 1815 per Europam gestis, de historia litterarum recentiori; Ill. P a s s o w de Sophoclis Ajace; Ill. T r e v i r a n u s de botanices elementis et phytophysologia; Ill. F i s c h e r de chemia universa corporumque organicorum speciali; Ill. S t e f f e n s de physice, anthropologia et hodegetice; Ill. H e n s c h e l de terminologia botanica, de systemate plantarum naturali, sexu plantarum, encyclopaedia medica, historia medicinae et pharmacologia audivi. Idem partes plantarum microscopio indagare me docuit. Ill. O t t o in osteologia, syndesmologia, anatomia universa et in cadaveribus lege artis dissecandis dux mihi fuit atque praeceptor benevolus. Ill. P u r k i n j e de physiologia; Ill. G r a w e n h o r s t de zoologia audivi.

Annis duobus cum dimidio praeterlapsis B e r o l i n u m me contuli ibique Ill. d e R a u m e r, qui eo tempore fasces academicos gerebat, in civium academicorum hujus universatis numerum die IX m. O c t o b r i s a. 1823 me recepit atque Ill. R u d o l p h i, t. t. ordinis gratiosi medicorum Decanus maxime spectabilis arti salutari incumbentibus adscripsit. In

studiis autem ita perrexi: Audivi scilicet Ill. Weifs de mineralogia; Ill. Erman de physice generali atque de electricitatis magnetismique doctrina; Ill. Link de geographia physica; Ill. Rudolphi de entozois, de organis sensuum; Ill. Horkel de physiologia; Ill. Fr. Hufeland de pathologia generali; Ill. Wagner de materia medica; Ill. Horn de pathologia et therapia speciali atque de morbis syphiliticis et psychicis; Ill. Juengken de aciurgia et ophthalmiatrice; Ill. Berends de semiotice et Hippocratis aphorismis audivi. Ejusdem sub auspiciis in clinico, cui ipse praeest, per annum sesquialterum artem medicam exercui. Per ill. C. W. Hufeland therapiam generalem atque morborum chronicorum pathologiam et therapiam specialem me docuit. Ab eodem aegrotos in ipsorum domiciliis curare didici. Ill. Rust de chirurgia et aciurgia (quam una cum Ill. Kluge tradit) audivi docentem. Copiam mihi quoque benevole fecit clinicum chirurgicum et ophthalmiatricum in nosocomio caritatis constitutum adeundi. Sub auspiciis Ill. Graefe in clinico chirurgico et ophthalmiatrico universitatis artem chirurgicam, quam vocant, exercui. Clinicum quoque medicum, cui Ill. Neumann praefectus est, frequentavi. Ill. Kluge artem obstetriciam et theoreticam et practicam, ossium fractorum luxatorumque cognitionem et curam atque desmologiam chirurgicam debeo. Ill. Casper formulas medicas rite concinnare et ad eas medicinam

parare et erudit et exercuit. **Celeb. Schlemm**
anatomiam universam audiui repetentem.

Studiis academicis jam finitis, praeceptoribus
meis illustrissimis amplissimis optime de me meritis
summas, quas possum, ago gratias intimo e pectore.
Beneficiorum, quibus in aeternum aevum discipulum
sibi obstrinxerunt, memoriam nulla unquam oblivio
e mente grata exstinguet.

T h e s e s.

~~~~~

1.

*In plantis describendis partium solam  
formam valere, neque naturam.*

2.

*Plantarum semina atque gemmas reapse  
nihil inter se differre.*

3.

*Sine gravitate ne cogitari quidem posse  
materiem.*

4.

*Nil recte concludi in arte medica, nisi per  
analogiam.*



5.

*Vires vitales per se nunquam, corpora  
viva semper aegrotare.*

6.

*Cataractam rarissime capsulae seu len-  
tis ipsius inflammatae morbum esse secunda-  
rium.*

7.

*Post hydroceles operationem radicalem,  
quam dicant, tunicam testis vaginalem non  
inflammari, sed partium circumjectarum in-  
flammatione et suppuratione deletam extrudi.*

8.

*Subitanea e vulnere morte, vulnus absolute  
lethale fuisse, non probari.*

---



